

الليل

(١)

إنتي و كل من سبقك في ترتيب السنين
الليل زمان كان بيننا عامل مشترك
كان واد جدع مصاحبنا عارف سرنا
و اما اتلقاكي مش هنا اتملعن
انا كنت فاكر قربنا لعنه
لكن لقيت إن البعاد ألعن
و إن السهر للصبح من غيرك
مجرد مضيعه للوقت
و إن السهر للصبح مع غيرك
مجرد مضيعه ليا
ففضلت بسهر كل يوم ألعن

(٢)

الليل زميل الأمس
و صاحب الانتيم
خان السهر و الدمع
و ال LM الفرط
مع اني كنت معاه
طيب و لا اتأخرت
الليل و بعد سنين
من قعدتي وياه
باعني برخيص لرخيص
مع اني غليته
البيت صبح بيته
و السهره صباحي
وبرغم اخره النور
مكنش أوله شرط
كان أوله طبطبه
و النور فى اخره جحيم

(٣)

الليل جيوش عسكر بالميري مكسيه
بتشد اجزاء الحنين و تفرغوا فيا
و الذكريات زي الرصاص الحي
و الليل مالوش في التخطيطات للجى
الليل بتاع النوستالجيا مش بتاع بكرة
بيجيب حكاوي الامس ذكرى ورا ذكرى
و يجيب حكاوي كتير في نهاري منسيه

(٤)

دفتر شيكات العمر قرب ينتهي
رخصه سواقتي للعوج محتاجه تتجدد
مديون لناس موجوده تحت
مديون لناس موجوده فوق
مديون لطوب الارض شوق
و الشوق ما يتسد

كل البنوك العامره بالاحلام
رفضت طلبات القروض
كل اللي كان .. مفروض
كل اللي جاي مفروض
يلقى الدراع مفرد
يرتاح و يتمدد
كل الظروف هي
و لا عمرها جدت
كل السنين عدت
من غير ماتديني
ابقى ارسميني حدود
او حتى شفيني
الليل مسلط ذكريات
علشان يصفيني